

# 《琉球朝貢考》

(清) 王韜 撰

## ●琉球朝貢考

琉球一國在東瀛海中，幾若黑子彈丸。其開國之始，並無甲子可稽。國朝定鼎燕京，琉球率先歸附；不敢自王，敦請襲封。嗣後貢職恪共，世守藩屬，憑藉寵靈鎮撫荒徼，享祚綿長，作東南屏蔽以迄於今，尚稱貢獻之邦而預共球之列；則謂琉球非我屬國者，非也。

第考琉球之所由來，其世次亦多茫昧。其間禪革互乘，匪特「隋書」歡斯之稱查無可據，即如洪、永初封亦非姓尚。今詳為覈審，上自天孫遞至今日嗣位之王，其統緒約略可言也。琉球始祖，其初有一男、一女生於大荒，自成夫婦，曰阿摩美久，生三男、二女。長男即天孫氏，開國始祖也；次男為諸侯始，三男為百姓始。長女曰君君，次女曰祝祝，為國守護神；一為天神，一為海神--今寺院有三首六臂女神手執日月，名曰「天海大自在神」，蓋即此也：此亦荒誕不經之尤者也。傳二十五代，姓氏俱無考。起洪荒乙丑至宋淳熙十三年丙午，逆臣利勇鳩而弑之，篡位自立。浦添按司舜天討之，利勇死；諸按司群奉為王，天孫氏遂亡。舜天為日本人皇後裔，三傳而外禪於英祖。自英祖至西咸，凡五傳。察度氏興，賢德素著，人心悅服；遂代其國。二傳，而為山南王思紹所併。以後則世為尚氏，至今弗替。明初，太祖遣使慰諭，始稱臣入貢，世為屬國。

景泰元年，國王思達遣百佳尼入貢；二年，遣察祈等入貢，已又遣亞間美等入貢。頻年以來，輶車在道；■琛獻異，包匭筐篚絡繹來庭，史不絕書：未嘗與明絕也。惟考日本史，明萬曆三十七年，義久取琉球。其後書琉球入貢者十：日本寬文十一年（當中國康熙七年）、天和二年（當康熙五十三年）、享保三年（當康熙五十七年）、寬延二年（當乾隆十四年）、寬政二年、明和元年（當乾隆二十九年、乾隆五十五年）、又八年（當嘉慶元年）、文化三年（當嘉慶十一年）、天保三年（當道光十二年）、天保十三年（當道光二十二年）。然其時琉球雖入貢於日本而亦內屬我朝，其貢舶之來、使臣之至，固彰彰可考也。況其朝貢日本之時，久已臣服中朝，永備屏翰；事在盟府，薄海咸知。如是，日本安得私琉球為己有也哉！

茲者，其國民船遭風，飄泊我朝；本當加以撫恤，何容日本為之置詞！即其遇臺灣野番之難，其人外於王化，雖歸中國之版籍，非屬中國之民人；如英、美諸國航海者無不遇之，未聞其與我中國相齟齬也。日本藉端生釁，遠遣使臣以相詰難，其謂我中國無人邪！琉球之為我藩屬，日本非不知之；乃必以此為辭，其志在翦滅琉球可知矣，豈真愛惜琉球也哉！是不得考之史冊，以與之辨（不數年，日本竟滅琉球，改為沖繩縣）。